

鄒氏家傳




世忠堂文集家傳目錄

錫山鄒鳴鶴鍾泉氏手著

男觀儀編輯

觀儀校訂
孫祖望參閱



仲說公家傳

成大公家傳

惟良公家傳

景韓公家傳

惕庵公家傳

此山公暨方恭人合傳

世忠堂文集

李太恭人家傳

曉亭公家傳

錫麓公家傳

照園公家傳

蘇門公家傳

體蘧姪家傳

從姪小西家傳

從姪蓉垞家傳

再姪禮畊家傳

再姪帖瞻家傳

仲說公家傳

公諱霖字仲說先世錢塘人曾祖誠明公祖知白公均仕
五季積德累仁父進發公仕宋眞宗朝以澶州功贈左屯
衛大將軍生十子皆力學有文譽或處或仕家聲丕振公
其最幼也年二十七登天禧三年進士授筠州推官累官
朝奉郎守尚書都官郎知涪鼎二州將出仕時進發公作
詩訓遺之其末句曰治取蒼生陰隲歸是以歷仕三十六
年所至以官爲家以民爲子惟恐朝廷之恩不下流而歎
息愁恨有形於聲者厚德及人固已多矣常曰不得乎親
不可以爲人不順乎親不可以爲子蓋未嘗一日不奉遺

世忠堂文集

訓也伯兄咸平第道士仲誼公卒遺孤擴字希聖年尙幼
公撫育而教誨之如子俾至成人宦游過常郡見風俗滄
厚卜居郡城之仁孝東坊實爲晉陵始遷祖年六十三以
歿配孫氏諱世南女封樂安君子一卽保之公墓在郡城
北七里德澤鄉林莊主穴

贊曰間讀員外方公蒙墓志知公任二州刺史時上欲授
以使節公辭不受蓋公之謹慎奉親訓有不以寵祿爲榮
者公墓久失康熙辛巳土人犁地得誌石請官修復越十
載庚寅筠州縉紳士庶表揚功德請祀公名宦祠故里松
楸之奉桐鄉俎豆之榮皆得之於五百年後彼蒼之報施

善人歷久彌彰如是嗚呼是亦可以觀矣

味淡而遠

俊讀

世忠堂文集



二

和天函意

俊讀

成大公家傳

成大公諱應茂誠明公十一世孫也自第七世德厚公由晉陵遷無錫至公凡四世曾祖仲元公未仕祖文遠公承事耶父聞善公將仕郎公亦以將仕郎仕於宋宋制以階易官士之被召而未得官者先授一階待選公世以文學才畧著註名選籍後適當宋季隱居終身卒葬黃壑主穴配許氏子四長仁聲號南山亦以將仕郎隱三仁顯四仁安子孫均繁衍其次嗣仁榮卽達甫公由華莊鄉徙居龍涇再傳子厚公三傳得明公皆元隱士四傳桂堂公入明朝五傳霜檜公建七宅於龍涇西居子姓六傳學古公以

世忠堂文集

三

義聞著授承事郎七傳至履坦公德行孚鄉黨黃堯咨酌泉錄詳載其事逮八傳至右湖公起家科第有大功於汀州而族乃大實爲錫城支昌熾之由故連及之贊曰源之遠者流必長邇自屯衛公以水孟薤本陰隲蒼生鄒之族衍天下矣而天下之鄒盛於錫錫之鄒悉自成大公公生當季世抱道隱居無所表見然大鄒氏之族者雖百世下必推本於公公豈待以表見爲表見哉

數百年世系源流敘次如湖掌上螺紋

俊讀

惟良公家傳

鳴鶴

曾大父惟良公高祖靜嶽公第五子也少有高志不

屑屑舉子業生當鼎革之初江淮吳越間寇氛未息公益
晦跡日從伯兄黎肩公寄情吟詠兼工繪事黎肩公久擅
詩畫名公名與相亞有二難二妙之目而矜重不輕下筆
家極貧餽粥不繼公嘯歌自若泊如也惟以惠麓宗祠久
而漸廢從黎肩公議偕羣從昆弟捐貲另建於香花橋南
經營創始備極辛勤歷今百數十年祠宇翼然歲時得祀
事無缺者公實與有力也公生於順治丙申 月 日
卒於康熙庚寅六月二十六日太學生以吾父官馳贈文
世忠堂文集

四

林郎配鮑孺人繼配鮑孺人子一卽吾祖景韓公也

贊曰公隱於詩隱於畫邑志附黎肩公傳亟稱之而志趣

高簡流播人間者絕少

鳴鶴

惟從舊幀中見折枝花數

筆并題黎肩公畫梅一詠風致超然不落凡境今歲

鳴鶴

輯錫城支譜得見創建宗祠原議公名次黎肩公後原始
慮終布置井井公生平不與人閒事而關係根本者乃復
詳盡如此嗚呼此公之所以爲公與

起手絕似昌黎

俊讀

景韓公家傳

鳴鶴

之生去大父景韓公歿垂六十年音容已杳梗概無

傳久矣然

鳴鶴

自垂髫至成童朝夕親庭訓吾父課讀外

時時稱述祖德嘗太息謂

鳴鶴

曰汝祖年末三十卽遭汝

祖母岳太孺人之變我甫五歲保抱提攜悉躬親之或以

再娶請則曰婦以耐貧積勞歿吾已有子持此終身矣蓋

鰥居者三十餘年已又曰汝祖以名秀才厯薦不售中歲

無意功名惟以課徒自給館西鄉藕蕩橋朱氏馮氏陳氏

家最久厯一館必十餘年或七八年爭維繫之不肯舍其

課文一以清真爲宗而尤善爲童子師童子書必令熟背

世忠堂文集

五

背後訓新書仍令溫讀舊書讀至四五日後始去口月終

復令再溫且時摘數章試背勤懇懇無一日一時間藕

蕩橋人羣語曰凡從鄒先生讀書者至老不忘一字其篤

實本性然也已又曰汝祖家無升斗儲羣從昆季及姪輩

多爲郡縣官者從不一詣緼袍粗糲若將終身訓徒訓子

外不知世有所爲富貴亦不知己之貧且賤也小子其誌

之嗚呼小子今年五十有四去吾祖課徒課子時百年卽

去吾父庭訓時亦數十年矣星霜屢易哀感係之曩日事

固厯厯如在目前也因思吾家自汀州公後累代簪纓科

名鼎盛獨吾曾祖以詩畫隱吾祖復教讀終身潛德弗耀

吾父乃以乙科官邑令設施未竟小子性愚質陋才力遠遜先人乃一試而捷南闈三試而捷禮部廿餘年拙宦屢歷坎軻漸躋通顯其不致隕越以貽吾祖羞者何莫非吾祖之蔭庇也何莫非吾祖之安貧守志鬱積以貽我後昆也小子敢一日忘哉公生於康熙庚午 月 日卒於乾隆丙子十二月初八日子一卽吾父此山公女一適太學生朱汝綸

不必脫胎瀧岡阡表而情真語摯處氣息逼真

俊讀

世忠堂文集

六

楊庵公家傳

公諱越字曰乾號惕庵二十八世耐庵公長嗣也勤學砥行逾冠補弟子員乾隆丙辰丁式本省舉人三試禮部不售以知縣需次簡發雲南時明庵公年七十矣公慮滇省路遙命子秀奉侍於家涕泣辭親偕弟蘭臺公赴省署彌渡通判護永北清軍同知復晉阿迷州事大府知公才以平彝途衝事劇特請實授未幾復委雲南令兼攝宣威州事公爲政以實惠及民爲生其所設施如立義倉置約田葺城垣捐地馬平鹽價類皆因地因時相其所急與要者一意行之亟亟不終日蒞平彝時生員某姦夷婦釀命學

世忠堂文集

七

使庇之囑大府寬其獄大府屢示意公執法不撓卒抵罪蒞宣威時湖廣民客死土豪某姦其妻謀佔產并謀殺孤公燭其情忽宣威二生來謁爲土豪游說以千金上壽公佯許之賊立具公升堂發其贓詰二生二生股票卽飭二生括遺產簿籍呈驗二生不敢匿乃召故客之弟至當堂給發命護遺孤返而抵姦佔者與二生於法公之清介有威斷又如此雖以此屢遭上官及同僚忌幾至於殆不恤也然以離耐庵公久寢食不安具文請終養兼程急歸則已於一月前易簀矣公大慟幾絕自此閉戶十年絕意進取每念亡親輒涕泣曰十四年竭力辦公稍益民事不足

償此終身痛也乾隆二十八年卒年七十二歲娶汪孺人
以賢孝稱子一卽秀六 字生

贊曰吾鄉顯宦富厚而 地者累累矣浮雲消散曾不一瞬
公貧宦也自滇歸傾囊二百畝歷孫曾保守如初蓋百年
於茲矣其自敘有曰迂而拙戇而直性如介石稜且堅與
世柄鑿璞自全嗚呼惟其柄鑿是以完璞百年來世澤綿
長有以哉

因地因時相其急且要者一意行之是無地無時不可
爲良吏也然非清介有威斷則仁而失之懦亦不能實
惠及民寥寥短傳循良之體用具見矣 俊讀

世忠堂文集

八

此山公暨方太恭人合傳

道光乙巳歲族父鍾泉觀察奉生母李太恭人喪歸壆時
安方思學爲文謁觀察於里第叩以文法觀察出示所

著寶素堂文集獲讀族祖此山公及方李兩太恭人行述
雖未能悉其行文義法然覺其情文相生讀之不忍釋也

越明年丙午觀察輯錫城支譜并補家傳若干篇將竣猥
以族祖及兩太恭人傳命安爲之安曷敢辭公諱麟

書字魯瞻此山其別號也自七世祖遷無錫越四傳成大
公生四子長南山公後分西南莊支爲安所自出次達

甫公後分龍涇支公其後也公幼卽有志漢宋儒學爲同

世忠堂文集

九

邑顧祭酒復初先生所器由舉人大挑起家爲故城宰勤
於民事積勞成末疾力請改教遷江甯教諭積十九年例

遷淮安府學教授以年老乞休越二年卒於家時嘉慶十

七年也距生於雍正五年享年八十有五配華太恭人繼

鮑太恭人方太恭人側室三張氏無所出次阮太孺人李

太恭人李太恭人別見內傳子四長宗范次學范皆先公

卒三鳴鳳四鳴鶴今觀察河南贈公以其官公慷慨有遠

畧而細行必飭方其爲宰故城也邑介漳衛二河之間河

壩地數被衝齧民棄不耕公至督民築隄開墾約三歲後

畝賦常稅三之一民樂趨事至今賴之其他善政多類是

惜位不稱其志未竟所施其爲教諭江甯也手誤四箴疏
臥碑說訓士尤以廉隅爲重規例修脯都不輕納自奉極
薄而每遇大比歲族人以赴試至者必館之齋中安邑猶
及聞族中年長者樂道之其爲教授淮安也官署益冷而
守益嚴山陽冒賑案起同官多以受賂敗公獨無纖塵染
超然事外人以是服公先見而不知公之素所操持固然
也及其卒也貧無以爲塋子少其拮据維持以克濟於艱
難者惟方太恭人是賴

太恭人姓方氏江陰名族也父曰文郁公懷才早卒母江
孺人食貧守志太恭人年未及笄已能以十指佐養及歸

世忠堂文集

十

於鄒此山公方因公車太恭人摒擋家事不貽公以內顧
憂後隨公之官任益以刻苦成公之介且時以古人治行
勗公公喜曰閨中得此良友不獨佐家可佐治矣無何長
次兩子均歿太恭人力勸公納遣室復舉兩子公自改教
後秉鐸金陵二十餘年惟日與諸名宿詩酒從容婚嫁瑣
屑皆太恭人獨任之公歿後貧益不支艱苦備嘗者十餘
年卒就其子成進士得祿以養而太恭人之所以教子者
一如所以佐夫子故觀察自爲州縣時政聲已大起實太
恭人有以成之也道光乙酉終於羅山署之正寢壽七十
八歲偕華鮑兩太恭人合塋於此山公之兆

贊曰士之以遠大自期者每不矜小節而束修白好之上
又往往紕於幹濟此才之所以難兼也讀公之所以教子
者曰從來大人物大事業皆從咬斷菜根做起旨哉斯言
可以想見公之爲人矣然嘗讀北門之詩而有感焉終窶
且貧室人交謫雖賢者不免憂心因而隕獲其所守者往
往有之矣然則公之所以始終一節不移其志者倘亦太
恭人相與以可成歟 二十九世西南莊支安國謨

世忠堂文集



李太恭人家傳

李太恭人保定清苑人也此山公宰故城自請改教歸途中連喪兩子方太恭人憂之勸公弔焉時年十有六以謹厚得女君歡生一子卽今觀察觀察生有異徵此山公時獎譽之而太恭人不敢以此稍自表異年三十九遭此山公喪願以身殉女君防視周密不得間抑鬱成心疾言動或失常然欲殉其主不能一日忘也一夕忽謂其子曰吾行當見汝父矣家人以其言語時時矐矐不及防未質明觀察忽心動張目見樓牕大啟驚起周視則太恭人自擲樓下已僵矣觀察大震號方太恭人急趨至相營救齒噤

世忠堂文集

七

藥不能進更數醫無策最後有教以生蜋和酒飲之者指楔其齒蜋乃下久之漸蘇閱數年始離床蓐而心疾間作則言笑矐矐如故然於事女君之禮未嘗稍越也其後觀察登賢書成進士方太恭人喜甚每捷書至輒呼太恭人曰汝子獲雋矣速起太恭人則起拜爲女君賀及觀察爲宰河南太恭人奉女君抵官所就其子之養與里居時無異一衣一食必女君命而後衣且食女君沒奉喪歸塋哀敬之思久而不衰比再蒞河南十餘年間觀察歷任繁劇遷同知擢知府以道員卽用太恭人守女君家法始終不敢有加於舊甲辰冬十二月終於河南省寓壽七十有一

丙午二月合墓於此山公之兆

贊曰觀察有大功於汴汴人思德政之所由來歸美太恭人喪歸時汴人哭送者數十里不絕櫬李錢給諫爲太恭人傳言之詳矣今

安邑

承觀察命誤內傳以垂家乘則以

閨門之庸行爲重故謹述太恭人節烈之性恭讓之德以爲族人法而居汴之事從畧焉嗚呼今世士大夫之家不深維召南安命之義而轉惑於公羊氏母以子貴之說甚至綠衣黃裏決裂先王之大防而不顧者往往而是聞太恭人之風其亦可以稍愧矣

二十九世西南莊支安邑謹誤

世忠堂文集

恭人之風其亦可以稍愧矣

恭人之風其亦可以稍愧矣

恭人之風其亦可以稍愧矣

恭人之風其亦可以稍愧矣

恭人之風其亦可以稍愧矣

恭人之風其亦可以稍愧矣

恭人之風其亦可以稍愧矣

恭人之風其亦可以稍愧矣

恭人之風其亦可以稍愧矣

曉亭公家傳

公諱儀字補山號曉亭二十七世擁書公長嗣也幼穎悟七歲卽解韻語比長績學攻文應南北闈凡十試乾隆庚辰始舉京兆嗣應禮部試又不得志年已四十餘矣擁書公時守河間爲援例得知縣選江西雩都令調彭澤丁父艱服闋選四川開縣調雲陽因公解任引疾歸先後服官十餘年其間爲江西鄉試同考官者再爲四川鄉試同考官者一所得多知名士公之爲治嘗自言曰見事貴明立心貴恕恕以行仁明以致決吏治大要無踰於此其在雩都有姦棍邱某調近鄰娶婦不遂黑夜執婦僕誣以僕姦

世忠堂文集

酉

主母公廉得之坐如律其在彭澤代鄰縣湖口驗夏某自縊案公以屍傷橫短不齊似手捺痕研詰死者幼孫得夏子斃其父狀寘重典其在開縣達州游擊緝匪妄挈平民二十餘人幾定讞矣公爲勘白其誣又委勘天全州捕役張成傷匪案驗傷痕俱在合面曰是追殺非鬪殺也且爲匪無證抵成罪其他發奸摘伏多類是大抵公之治獄不尙鉤距而以誠一精細之心察之故能明以致決而於生死出入尤兢兢致慎云至請豁禾豐三堡屯田浮糧積困以蘇請設巡船於雲陽江濱溺者得濟皆實惠及民之事則公之仁而恕也居恆手不釋卷爲治具有本源而未竟

其用論者惜之著有十三經字學音義合韻八卷讀史備覽二卷詩詞六卷卒年八十有二配徐孺人子五長學曾以孝廉世其家宰尤溪敏練有政聲次學琦太學生三學弼太學生四學愈五學修孫十餘人晉蕃郡增生

論曰自吏治之衰闕冗者無論其能者但知以催科爲務案多畱牘例限屆則刑驅勢迫以意結訟求其無冤獄難矣聞公之令雲陽也俗健訟有生助其徒嘵嘵訟庭久不決命講曾子居武城章讀至負芻之禍未有與焉媿謝而退是蓋以心感心有不同於俗吏之爲者矣子曰聽訟吾猶人也必也使無訟乎以心感心無情者自不得盡其辭

世忠堂文集

五

今乃刑驅勢迫而亦曰使之不得盡其辭哀哉

聽訟固吏治之一節然良吏未有不盡心於此者至恕以行仁則循吏能吏之分又在此

俊讀

錫麓公家傳

鳴鶴從兄錫麓公諱奕孝字念喬乾隆癸酉舉人丁丑以一甲第三名及第授編修久涉清要歷掌文衡官至工部左侍郎福建學政生平遭際隆盛

具載

國史邑乘及諸家紀載中其最鉅者如丁酉充起居注官時見載筆非一人手法參差公手謄記注成規一卷監史官記載畫一有裨實錄丙午任國子監祭酒時適新建辟雍成

世忠堂文集

去

駕幸講學環橋觀聽者億萬計公宣講天行健一節經義肅穆宏深

天子動容傾聽

宸衷深契

錫命駢蕃儒臣稽古之榮近世罕覯逮兼管樂部時天子知公深通律呂神悟獨超

命纂律呂正義續編四卷附正義後書成恭進

天獎再三繕入四庫全書嗣復奉命譜詩經公據文辨音據義定調闢朱載堉十六彈俗說一復三百篇本音

賜名詩經樂譜全書頒行天下從此雅頌各得其所千百

世得聞正聲皆公生平尤大彰明較著者也然皆關係
皇朝掌故學士大夫人人能言之能傳之而公之持介節
務根本則有世莫知之者公任祭酒時和珅柄國重公才
極意羅致稔公善音律製器甚精屢邀公造其室願得指
授公辭之無已請假器一觀公又辭和深銜之適以司成
七載不進一階有以識時務勸公者公曰命係於天恩出
自上若何能爲耶其持介節如此公考既庭公早歿九歲
而孤號痛欲以身殉逾於成人逮官京師時接族人信知
唐莊斗璩公墓旁護墳地爲土豪朱廷榮申買鳴官累年
朱多方賄結事且寢公力以恢復自任與族人札商伸理

世忠堂文集

七

動輒千言舉族警動奮發堅持弗變卒得白乃爲立界勒
碑至今保守無缺失實公力也其務根本又如此

鳴鶴續

修支譜以小山伯祖全譜爲主因得見公譜外紀畧四卷
爲全譜辨異同補缺佚親筆條記纖晰無遺益嘆公之精
神周貫爲不可及而後世續修者乃以有本也公之歿以
乾隆癸丑年七月二十日年六十六配張氏子二長曾蔭
官朝邑主簿時適甘肅逆回不靖會蔭供億兵差事集而
民不擾有政聲次會傳高才不遇世交滿天下忍貧從不
一謁皆能秉公之教者也

贊曰古大臣經天緯地功業爛然而出處進退之間門庭

庸近之地一有不謹識者疑之後世議之史冊間比比然也公以儒臣逢

聖世遇大典禮大制作正色垂紳折衷羣議備一朝故實集千古大成盛矣無以加矣而小子從數十載後誦芬述德必舉郤柄臣篤宗支數事特筆書之惟恐不詳不盡豈無謂哉豈無謂哉公良吏才也九泉有知其必以斯論爲知言

大見識大文章 俊讀

世忠堂文集

六



煦園公家傳

公諱鏞字夔和號煦園二十七世蘭臺公長嗣也蘭臺公以清德篤行重鄉閭公幼秉庭訓言動不苟弱冠以諸生入太學銳意科名屢薦屢黜時家門鼎盛從伯亦樓公官直隸深州牧擢河間守從兄豫齋公官粵西橫州牧從弟湘漁公官楚南清泉令從弟念泉公官河南杞縣令均以公厚重工文詞先後招致爲課師公橐筆往來以間赴京兆試故在深州河間侍亦樓公最久嗣遊粵西遊楚南遊河南羣從爭維繫公公以夙志未遂且二親在堂不欲久畱也乾隆辛卯年四十四時已十六試不售矣以考職待世忠堂文集

九

銓吏目甲午揀發南河補海堰閘官尋遷劉馬莊巡檢自念以文士處雜流中職所當爲者必躬必親不稍露不屑意而自守介介事上體統悉遵會典意所不可者雖一揖不妄下上游益以此重公咸曰鄒君真讀書官也前館京師時文名噪甚公卿子弟受業者以百數逮官南河當道多識公名以禮延致教讀公循循善誘造士如林如尙書那公清安侍郎宋公鎔其尤著者也在官八年奉父諱歸不復起家居仍課徒自給佐從兄曉庭公纂輯房譜有條不紊間涉吟詠語多見道而其尤注意者以生平讀書有得不獲展布子汝翼又以貧入幕屬望諸孫甚切乃仿先

正格言曰誤數則名曰課孫錄自起居食息以及居心行事出仕應世分門條教字字鞭辟近裏後生可終身誦者也卒於嘉慶乙丑六月二十六日年七十有八配陽湖劉氏子一卽汝翼女一

贊曰余於公爲從弟行嘉慶初公以事至江甯因得拜謁余齒尙稚久不記憶矣茲以修輯支譜得睹公親筆訓汝翼書有曰魯瞻叔幼子某年纔十一明白端方可必其爲儒林中人汝其志之夫明白有才也端方有德也余至今愧此四字而公乃於未成童時識之且以儒林鄭重許之嗚呼公殆雷心天下士而不遺小弱弟耶小弱弟其何以世忠堂文集

三

得免斯愧以無貽公知人之愧耶

凡大人物識量英年早露頭角所難得者知人之鑑英偉之器萃於一門斯誠千古佳話耳

俊讀

蘇門公家傳

公諱武鉞字念泉號振鵬一號蘇門爲景濂公第三子由
貢生援例選授河南輝縣知縣未幾調杞縣旋丁母憂服
闋揀發貴州補青谿縣以驛傳事罣誤鑄級改官山東永
利場大使公爲縣令未久其設施多未竟然操守廉遇事
不苟人有陰被其澤者故居官雖無赫赫名而所至民皆
愛戴少孤母張太安人撫之成立出仕後恪遵母訓勤於
其職然公餘一飲一膳必待母側善承色笑張太安人喜
曰吾兒做官仍如嬰兒時也家故豐好施予宦後家稍落
顧人有急必勉力應其請無吝色無矜心年逾七十及見
世忠堂文集

三

長孫植行成進士入翰林次孫植義植芳入泮人以爲公
之食其報云

論曰昔歐陽氏有云爲善無不報而遲速有時旨哉言乎
每慨士大夫躬膺厚實一時烜赫無餘澤以及子孫不數
年門庭寥落後嗣多不振以視公之所得其爲顯晦榮悴
何如也是亦可以風世矣

簡潔

俊讀

體遠姪家傳

體遠姪名汝瑗二十八世振箕公長嗣也生而岐嶷凝重靜默如成人讀書曉大義弱冠後以振箕公年邁家日中落乃棄舉業專治家政自應對進退以及會計料量凡可以代親勞體親心者委曲詳盡以身任之振箕公心乃大安與兩弟合爨數十年怡怡無間直如一人仲弟汝瓚無出以次子蔭楠弱不好弄命爲嗣曰佳兒庶以慰吾弟其友愛蓋性生也吾宗自讓初公遷錫城後分三大房聚族羣居食指數百人婚嫁喪葬殆無虛日咸取裁於體遠體遠尙質尙簡而不失之陋舉辦悉當偶遇膠轕難處事衆

世忠堂文集

三

論紛然體遠默坐靜聽徐徐出一言事輒解或就衆論中稍勝者首肯示意不出一言事亦解或叩其故體遠曰是無他無我相無人相一衷諸理而已理非印板之理也情在理先勢在理後合情與勢以觀理解事乃解矣又曰人之生也直直須以曲出之易曰曲成萬物中庸曰曲能有誠范文正曲體人情祇理會得曲字義人情自協吾能曲吾正善用吾直耳其生平得力如此而其爲族黨尤推重者如唐莊公墳餘地爲朱姓盜賣訟久不決體遠竭力理處事得白晝界歸田至今保守又如盜發愚谷公配吳淑人墓體遠贖金質官獲盜抵罪復撥公產供祭掃費歲

時無闕又如宗祠祭田多荒蕪公費不敷體蘧力任清理
并出已資爲之墊祠事乃畢舉或稱之則曰此吾子孫分
也其他急公尙義多類此族黨無賢愚無長幼皆曰體蘧
長者也吾族當日奉爲師表者也歿於道光庚寅閏四月
十四日年七十八歲配錢氏繼錢氏繼吳氏皆賢淑子四
長楫次蔭楠嗣汝瓚爲後官辰州府通判勤明有內心如
其父三果四廷標孫凡十二人

贊曰昔先大夫有言人當爲天下不可少之人次則爲鄉
里不可少之人又次則爲族黨不可少之人若僅爲一家

不可少之人或并無補於家難矣如體蘧者庶幾族黨不

世忠堂文集

三

可少之人與猶憶二十五年前余赴豫補官體蘧命二子
隨行執余手送別曰兩兒均倚吾叔然能稍助吾叔做好
官者必蔭楠也嗣是蔭楠從余十餘年綜核諸務頗資其
力益信體蘧言爲不虛逮蔭楠任楚南別駕所至有政聲
人曰蔭楠十餘年從余宜其爲好官余則曰體蘧雖未出
仕一言一動莫非官箴其貽謀有自來哉余故攄實事爲
之傳以示蔭楠蔭楠其益勉旃

無我相無人相合情與勢一衷諸理而委曲行之天下
豈有鞦韆難處之事乎任事者當三復斯言

俊讀

從姪小西家傳

小西從姪名汝翼號此齋二十八世煦園公長嗣也幼穎異好讀書不滯章句偶見河防水利食貨營繕諸家言慨然曰此真當世有用之學讀之至忘寢食口講指畫若有心得視科舉業泊如也年十九母邁奇疾小西竭誠露禱願以身代疾竟愈弱冠後隨煦園公赴東臺聞官宿遷巡檢任煦園公以憂歸貧甚小西不得已幕遊淮徐間歷邳睢外北桃南桃北蕭南睢南諸廳始司筆札繼則專席河工庫貯小西畱心經世學久矣河防書如劉潘朱靳張嵇諸名臣著述尤所研究至是乃以心得者驗之閱歷閱歷

世忠堂文集

五

久之覺古法治河按之今日情勢多格不行閱歷復久之恍然洞然屢告主河事者曰劉潘諸書累萬言不外漢書王仲通傳商度地勢一語仲通之治河曰鑿曰破曰直截曰防遏曰疎決曰更相洄注至今皆可實行在達其意不泥其迹而已泥其迹則一廳一汎治且不同一歲一時治且不同達其意則今之治卽劉潘朱靳張嵇之治且卽仲通商度地勢之治也又曰河流世稱濁治當以清河工習尙虛治當以實河務緩不濟急治當以豫以速其識力卓越如是是以工無難易夷險小西至輒辦辦輒當且省且彌後患主河事者延致恐後通工一時無兩徐心如河督

戴可亭相國蘇樸園觀察皆納縞紵而佐張省齋觀察凡二十四年佐河督黎襄勤凡十三年歷時最久襄勤累著奇績爲時名臣章奏悉出小西倚如左右手嘗欲仿靳文襄遇陳潢故事特疏上達小西力辭至再襄勤益重之常曰濱河百萬蒼生君直以三寸筆千言贖救之耳其望重如此而小西退讓恐後清節愈厲雖一函一束不輕往來修脯外絕無所染寒素如老諸生逮襄勤歿小西以積勞成疾辭張蓮舫河督聘遽返里門遂不出家居十餘年修祖墓置祭田待宗族加厚而教三子極嚴歿前數月手書不可不知錄此齋畱語二則示後語多近道自輓一聯曰

世忠堂文集

五

不求不忤平生志全受全歸此日心蓋不僅以治河才畧見者也歿以道光丙申年五月十六日年七十九歲娶顧氏繼娶龔氏子三皆龔出長宗楷以廩生待銓縣佐次宗模太學生三宗枚鹽提舉銜東河候補通判均以勤敏繼家聲孫七人

贊曰小西長余四十餘歲余年十七自淮安歸得晤小西方頤長髯偉丈夫也爲余論治河源委推重黎公甚至余神往久之嗣余以公車三過清河小西必告黎公爲余備車馬北行黎公見余制藝大稱賞以爲蘊蓄宏深必非凡器欲延致課子未果余分發赴豫補羅山令爲黎公桑梓

地適黎公歿

諭賜祭葬余經營盡禮復爲請祀鄉賢是殆有前緣耶不
數年余調祥符令擢蘭儀丞署衛輝守授開封守三權開
歸道篆宦跡不離河濱者垂二十年小西年髦矣以書抵
余曰襄勤清能澈底勞不惜身濁流中未見其匹吾叔河
干盡瘁必躬必親多年劇任清風灑然吾不願叔常在濁
流中而事關國計民生甚鉅襄勤不作砥柱何人吾叔其
勉之哉嗚呼德薄才拙如余何敢仰望名賢而小西以思
襄勤者勉鄙人非爲門祚計也佐名賢治理有年乃心君
國久矣身雖終隱志切匡時其亦老驥伏櫪之心哉

世忠堂文集

三

小西之長於治河固係超絕千古然非此筆亦不足以
達之贊中補敘始終交誼亦復一往情深

後讀

從姪蓉垞家傳

嗚呼蓉垞汝叔鍾泉今乃執筆爲汝傳汝知之耶蓉垞性矯矯余亦落落嘉慶壬申余自淮安歸里相晤於惠山宗祠握手如平生嗣是出必偕行坐必聯席相與考疑義論古事議論有合有不合或至斷斷爭累日不決旁觀詫曰兩書歎而兩書歎訢合愈無間也逮道光乙未余官蘭儀丞蓉垞不遠千里來暎余余奔走河干昕夕無暇暇則必與談修防機要蓉垞據古論今時有以益余聚首兩載乃歸歸不及三年而凶耗至矣自念知蓉垞者莫如余蓉垞先歿非余莫傳而盤錯紛乘屢作屢輟今乃以修支譜始

世忠堂文集

毛

執筆爲之傳能不泣數行下耶蓉垞其知之耶蓉垞秉異人資讀書目數行下下輒省記歷歲久不遺一字又善沉思思窮日夜得妙悟迥非恒徑是以諸經義疏諸史評論下至古文家詩家詞家以及天文輿地水利卜筮諸雜家莫不窮源竟委貫串融會嘗曰能讀詩經自知今韻多舛能釋書經自知句讀多誤又曰自周子太極圖說張子西銘外無古文可以知其宗尙矣生平不欲以時文名而落筆超淡與世迥絕偶降格爲時墨式古光黝然自非凡豔始癸酉迄庚子凡十三試屢薦不售癸酉首場已定第五名付梓人於二場病未與試故擯辛卯主司擬元以三場

策微疵復擯蓉垞慨然曰吾非科名中人吾何以不愧爲
讀書人耶益下帷攻苦研精覃思一寢一食一言一動無
非晤對古人有所見輒書小帖帖積厚至二尺許蠅頭細
書人多莫辨時而蹙額時而解頤時而面壁自語忽鳴嗚
飲泣不止其喜也其憂也其喜而憂也殆無非心乎古人
耶蓉垞性介介一縑一束不輕納與人約期雖大風雨必
以時至視勢利交避之若仇同里惟余與顧君蘭崖丁君
暢之秦君笠漁稱至契而遇同輩以和以謙下抑抑然常
若不勝其尤爲宗黨所重者事親愉愉以色養在余蘭儀
署中以思親故常終夜哭余爲薦陳州守王松石館修頗
世忠堂文集

元

豐力辭至再余苦畱乃陰買小舟竟去畱書別余曰因貧
出遊不能因貧忘親叔共諒姪乎嗚呼蓉垞孝子也真讀
書人也真無愧於古人者也

贊曰余爲蓉垞諸父行而交最深憶在蔡氏館中聯床論
心蓉垞曰吾叔異曰大用祇須守今日寒窗苦讀心胸余
曰如韓忠獻王文成旋轉乾坤纜筭大用此則非寒窗苦
讀時心胸所能有也蓉垞曰姪言守叔言爲還是一理遠
蓉垞赴蘭儀贈余詩有曰北塘憶昔眠聯床論古艱鉅慨
欲當壯心飛揚誰假手而今可吐胸中藏余荅詩有曰自
知姜桂質久與鹽齋鄰五味日和調漸失香與辛於用則

便矣貌苦非其神晨鐘時一發汗下猶津津可以想吾兩
人之胸襟與氣誼矣歲乙巳余銜恤歸來檢蓉垞遺稿得
詩若干首古文若干首時文若干首將付之梓而所爲小
帖積厚二尺許者句零字落多不可讀一二可讀則皆精
深有古義已囑其高足顧君笠農龔君孟暘秦君臨士長
嗣漱六悉心摩繪碎金寸璧合之皆傳世寶也嗚呼蓉垞
之死歷數年矣其人與骨俱朽而有其不朽者在蓉垞死
可矣

得此文蓉垞不死矣

俊讀

世忠堂文集

五

再姪禮畊家傳

禮畊諱植行字雍度二十八世蘇門公之孫穎亭姪之子也穎亭諱雯性孝友蘇門公歿以哀毀卒生四子禮畊於次居長少承庭訓以國子生中乾隆乙卯順天舉人嘉慶乙丑成進士改庶吉士授編修丁卯戊辰間祖父相繼謝世奔喪旋里痛不欲生服闋哀痛未釋思課徒以終老親族力勸始出仍官編修己卯教習庶吉士分校順天鄉試

今
上御極之元年充實錄館纂修勤於其職奇寒盛暑無一日曠有密以名薦者

世忠堂文集

三

特旨召見擢國子監司業遷翰林院侍講侍讀壬午視學山西官終詹事府左春坊左庶子禮畊積學工文於經史外兼明元象性耿介不苟同時俗官編修十餘年祿薄不足自給幾至炊釜塵生讀書不輟晏如也然卒蒙

天子特達之知遷清秩典文衡不可謂之不遇矣其視學山西也謹闢防勤校閱故所拔多知名士今兵部尙書文公慶內閣學士全公慶則己卯分校所得士也卒年五十有六娶吳郡沈氏子一德輝現任福建仁壽縣丞胞弟植義字方畊植芳字香度植信字中孚均醇謹力學不遇早

卒

論曰官先事士先志蓋必志以植品以善用其才與學乃
可當官而事事禮畔自通籍後官京邸與人落落勢要之
門終歲不通一刺羣以爲冷翰林而潛心編纂奉職維謹
卒被知遇所謂先志先事者庶無愧焉世之仕則熱中奔
走形勢之途雖趨起噤喘而不恤而當官責任反以怠忽
失之者比比然也如禮畔者可多得哉

一冷一熱對炤天然 俊讀

再姪帖瞻家傳

帖瞻名印綬字錫桓二十九世庭藻長嗣也生彌月而孤
祖母高母徐兩代孀居倍極艱苦帖瞻穎悟過人五歲徐
太孺人親授孝經小學稍長發憤忘寢食嘗以讀書不成
無以對孀居二老自警年十九入泮二十一領本省鄉薦
七試禮部屢薦不售嘉慶戊辰大挑一等以知縣用請於
吏部改校官或勸阻之帖瞻曰北上時吾母諄諭曰汝性
迂直卽得邑令慎毋嘗試吾母知兒深故憐兒切也兒忍
違母乎且母老祖母更衰惟校官可朝夕承歡耳卒就教
謁選得六合教諭訓士首重孝弟次及立品諸生以文爲
世忠堂文集

三

贊者悉心筆削常別製一藝示程詳密逾於課師問字之
車滿戶外六合有攻訐荒籍之習荒籍者先世清白而無
應試者也帖瞻以例得准考且先世不應試子孫應試乃
自好者攻訐尤無理白大府永禁之荒籍之名遂革丁丑
丁高太孺人承重憂回里服闋署海州學正題興化教諭
訓士衡文一如在六合時興邑濱運河水災屢告上游以
帖瞻廉明持正屢委辦賑盡心查覈災民沾實惠最後道
光六年洪湖盛漲車邏五壩均開興化成巨浸受災最重
時議以册報待賑戶口須

帑數十萬費太巨欲接戶以一大口一小口爲限帖瞻慨

然曰應賑則十口不爲濫不應賑則一口亦濫是何可預
限耶乃乘小舟赴各莊細查日從風雨泥濘中目判手填
不遺一口而捏冒者對衆刪之奸民率黨來爭不爲動以
是費

帑不十萬無一民不活者是役也出入洪波巨浪凡三閱
月受濕深積勞更甚遂得疾屢治屢劇八年七月十三日
卒於官帖瞻凡爲教官二十餘年門下士秀出者多掇科
第且多端人平時不以一事干有司而邑有大政自各上
游至邑大夫及其鄉之士大夫時來咨詢帖瞻口講指畫
必詳必盡悉中肯綮咸曰校官中乃有斯人斯人乃以校

世忠堂文集

三

官終耶配朱氏繼華氏子一述洙

贊曰天下州邑凡一千五百餘地校官或設一員或二員
數逾三千人凡以訓多士宣教化也此三千人者各舉其
職士氣振民風自醇關係豈淺鮮哉乃世之官斯職者以
閒冷自處優游終老甚且以多索費金旁撓政事爲能吾
父秉鐸二十年落落寡合每與同列議事歸輒嘆曰世乃
有如許齷齪人談齷齪事其寄慨深矣帖瞻立身本末如
此此真克舉其職者耶古曰求良臣於孝子之門帖瞻孝
子也豈止克舉其職也耶

人能自立隨地皆可自盡何處不可爲耶無氣官寫得

生氣勃勃
俊讀

世忠堂文集

三



